


大智度論

第六十二

二百十四
端二

488/92



Vertical stamp or text, possibly a library or archival mark.



大智度論卷第六十二

龍樹菩薩造

姚秦三藏法師鳩摩羅什譯

釋照明品第四十

訖四十一
品上



尔時慧命舍利弗白佛言世尊是般若波羅
蜜佛言是般若波羅蜜世尊般若波羅蜜能
照一切法畢竟淨故世尊應礼般若波羅蜜
世尊般若波羅蜜不著三界世尊般若波羅
蜜除諸闇暝一切煩惱諸見除故世尊般若
波羅蜜一切助道法中最上世尊般若波羅
蜜安隱能斷一切怖畏苦惱故世尊般若波
羅蜜能與光明五眼莊嚴故世尊般若波羅
蜜能示導墮邪道衆生離二邊故世尊般若



波羅蜜是一切種智一切煩惱及習斷故世
尊般若波羅蜜諸菩薩摩訶薩母能生諸佛
法故世尊般若波羅蜜不生不滅自相空故
世尊般若波羅蜜遠離生死非常非滅故世
尊般若波羅蜜無救者作護施一切珍寶故
世尊般若波羅蜜具足無能破壞故世尊及

若波羅蜜能轉三轉十二行法輪一七諸法
不退不還故世尊般若波羅蜜能示諸法性
無法有法空故世尊應云何供養般若波羅
蜜佛言當如供養世尊礼般若波羅蜜當如
礼世尊何以故世尊不異般若波羅蜜般若
波羅蜜不異世尊世尊即是般若波羅蜜般

若波羅蜜即是世尊是般若波羅蜜中出生
諸佛菩薩辟支佛阿羅漢阿那含斯陀含須
陀洹般若波羅蜜中生十善道四禪四無量
心四無色定五神通內空乃至無法有法空
四念處乃至八聖道分是般若波羅蜜中生
佛十力十八不共法大慈大悲一切種智
時釋提桓因心念何因緣故舍利弗問是事
念已語舍利弗何因緣故問是事舍利弗語
釋提桓因言憍尸迦諸菩薩摩訶薩爲般若
波羅蜜守護以漚和拘舍羅力故於過去未
來現在諸佛從初發心乃至法住於其中間
所作善根一切和合隨喜迴向阿耨多羅三

藐三菩提以是因緣故我問是事憍尸迦。菩
薩摩訶薩般若波羅蜜勝檀波羅蜜尸羅羈
提毗梨耶禪波羅蜜譬如生盲人若百若干
若百千而無前導不能趣道入城憍尸迦。五
波羅蜜亦如是離般若波羅蜜如盲無導不
能趣道不能得一切種智憍尸迦。若五波羅蜜
得般若波羅蜜將導是時五波羅蜜名為有
眼般若波羅蜜將導得波羅蜜名字釋提桓
因語舍利弗如汝所言般若波羅蜜將導五波
羅蜜故得波羅蜜名字舍利弗若無檀波羅
蜜五波羅蜜不得波羅蜜名字若無尸羅波
羅蜜羈提波羅蜜毗梨耶波羅蜜禪波羅蜜

五波羅蜜不得波羅蜜名字若尔者何以故
獨讚般若波羅蜜舍利弗言如是如是憍尸
迦無檀波羅蜜五波羅蜜不得波羅蜜名字
無尸羅波羅蜜羸提波羅蜜毗梨耶波羅蜜
禪波羅蜜五波羅蜜不得波羅蜜名字但菩
薩摩訶薩住般若波羅蜜中能具足檀波羅
蜜尸羅波羅蜜羸提波羅蜜毗梨耶波羅蜜
禪波羅蜜以是故憍尸迦般若波羅蜜於五
波羅蜜中最上第一最妙無上無與等舍利
弗白佛言世尊云何應生般若波羅蜜佛告
舍利弗色不生故般若波羅蜜生受想行識
不生故般若波羅蜜生檀波羅蜜不生故般

若波羅蜜生乃至禪波羅蜜不生故般若波羅蜜生內空乃至無法有法空四念處乃至八聖道分佛十力乃至一切智一切種智不生故般若波羅蜜生如是諸法不生故般若波羅蜜應生舍利弗言卍尊云何色不生故般若波羅蜜生乃至一切諸法不生故般若波羅蜜應生佛言色不起不生不得不失故乃至一切諸法不起不生不得不失故般若波羅蜜生舍利弗白佛言如是生般若波羅蜜與何等法合佛言無所合以是故得名般若波羅蜜卍尊不合何等法佛言不與不善法合不與善法合不與世間法合不與出世

間法合不與有漏法合不與無漏法合不與
有罪法合不與無罪法合不與有爲法合不
與無爲法合何以故般若波羅蜜不爲得諸法
故生以是故於諸法無所合尔時釋提桓因
白佛言世尊是般若波羅蜜亦不合薩婆若
佛言如是憍尸迦般若波羅蜜亦不合薩婆
若亦不得釋提桓因言世尊云何般若波羅
蜜亦不合薩婆若亦不得佛言般若波羅蜜
不如名字不如相不如起作法合釋提桓因
言今云何合佛言若菩薩摩訶薩如不取不
受不住不著不斷如是合亦無所合如是憍
尸迦般若波羅蜜一切法合亦無所合尔時

釋提桓因白佛言未曾有也世尊是般若波
羅蜜為一切法不起不生不得不失故生須
菩提白佛言世尊若菩薩摩訶薩行般若波
羅蜜時作是念般若波羅蜜若一切法合若
不合是菩薩摩訶薩則捨般若波羅蜜遠離
般若波羅蜜佛告須菩提復有因緣菩薩摩

訶薩捨般若波羅蜜遠離般若波羅蜜若菩
薩摩訶薩作是念是般若波羅蜜無所有空
虛不堅固是菩薩摩訶薩則捨般若波羅蜜
遠離般若波羅蜜須菩提以是因緣故捨離
般若波羅蜜須菩提白佛言世尊信般若波
羅蜜為不信何法佛告須菩提信般若波羅蜜

則不信色不信受想行識不信眼乃至意不信色乃至法不信眼界乃至意識界不信檀波羅蜜尸羅波羅蜜羸提波羅蜜毗梨耶波羅蜜禪波羅蜜不信內空乃至無法有法空不信四念處乃至八聖道分不信佛十力乃至十八不共法不信須陀洹果斯陀含果阿那含果阿羅漢果辟支佛道不信菩薩道不信阿耨多羅三藐三菩提乃至一切種智須菩提白佛言世尊云何信般若波羅蜜時不信色乃至一切種智佛告須菩提色不可得故信般若波羅蜜不信色乃至一切種智不可得故信般若波羅蜜不信一切種智以是

故須菩提信般若波羅蜜時不信色乃至不信一切種智

釋曰上佛弥勒須菩提釋提桓因共說隨喜義舍利弗雖嘿然聽聞是般若波羅蜜隨喜義甚深無量無邊大利益衆生雖漏盡寂滅發歡喜心從坐起合手白佛言能作隨喜斷諸戲論利益無量衆生今入佛道者是般若波羅蜜佛可其語故言是般若波羅蜜中說諸法實相諸法實相中無戲論垢濁故名畢竟清淨畢竟清淨故能遍照一切五種法藏所謂過去未來現在無爲及不可說是故舍利弗言世尊般若波羅蜜能照一切法畢竟

淨故般若波羅蜜能守護菩薩救諸苦惱能
滿所願如梵天王守護三千大千世界故衆
生皆禮三界中三毒泥所不汙故言不著三
界破一切愛等百八煩惱我見等六十二見
故言破無明黑闇諸法中智慧最上一切智
慧中般若波羅蜜爲上以智慧爲本分別四
念處等三十七品是故言一切助道法中最上
能斷生老病死等諸怖畏苦惱故言安隱是
般若波羅蜜中攝五眼故言能與光明離有
邊無邊等諸二邊故言能示正道菩薩任金
剛三昧斷一切煩惱微習令無遺餘得無礙
解脫故言一切種智復次知一切法揔相別

相一切種智因緣故名一切種智能生十方
三世無量諸佛法故言諸菩薩母一切法中
各各自相空故言不生不滅斷常是諸見本
諸見是諸結使本諸結使是一切生死中苦
本是故言遠離生死能令衆生信三寶等諸
善法寶得諸善法寶故得世間出世間樂能
令衆生得二種樂故言無救者作護是般若
波羅蜜相乃至十方諸佛所不能壞所以者
何畢竟不可得故何況餘人故言具足波羅
蜜是般若波羅蜜中無自性故說諸法不轉
生死中不還入涅槃不生故不轉不滅故不
還故言能轉三轉十二行法轉三轉十二行

法輪義如先說一切法有二分若有若無是般若中有亦不應取無亦不應取離是有無即是諸法性是故言能示諸法性如是等無量因緣讚嘆般若後當廣說問曰是般若波羅蜜是無相相有人心未淳熟求其定相不能得便生慢心是故舍利弗問應云何供養

佛教言當如供養佛以人從久遠已來深著衆生相於貴法情薄是故言如供養世尊智者觀之佛與般若等無異所以者何般若修集即變爲一切智此中佛自說因緣是般若波羅蜜中出生賢聖等出生十善道等世間出世間法乃至一切種智今時帝釋作是念

者帝釋意以舍利弗漏盡離欲人如似著法
人讚歎般若今舍利弗自說因緣菩薩為般
若守護故以方便力能隨喜福德迴向而不
破般若波羅蜜相是事希有故尊敬般若波
羅蜜是故問佛云何供養復次憍尸迦般若
波羅蜜自力勢故勝五波羅蜜問曰五波羅
蜜應以五盲人作喻何以乃說百千答曰此
中說其力勢不論多少復次若言導五不足
為貴故說百千復次波羅蜜亦多如賢劫三
昧中有八万四千種波羅蜜廣說則無量問
曰檀波羅蜜亦有眼所以者何信有罪福破
邪見等無明故能布施何以故喻無眼答曰

布施中智慧是客來非正體譬如四大常和合不得相離諸波羅蜜和合亦如是不能趣道道者菩薩十地道城者一切種智等諸佛法復次道者八聖道分城者涅槃如盲人雖有手足力不能得隨意有所至得有眼人示導則隨意所作皆能成辦五波羅蜜雖各各有事能不得般若示導尚不得二乘何況無上道五波羅蜜得般若波羅蜜將導故得波羅蜜名字至或佛道帝釋問汝自說諸波羅蜜和合乎相佐助如四大不得相離如是者般若波羅蜜亦待五法何以獨說以般若故五法得波羅蜜名字荅曰雖六事和合乎相

佐助但般若波羅蜜力大故五法因得波羅
蜜名字譬如合散雖衆藥各各有力石勢大
故名爲石散又如大軍摧敵雖各各有力主
將力大故主得名字舍利弗已問供養般若
事今問行者云何生般若波羅蜜佛答若行
者觀色等諸法不生相是則生般若波羅蜜
舍利弗復問云何觀色等不生故般若波羅
蜜生答曰色等因緣和合起行者知色虛妄
不令起不起故不生不生故不得不得故不
失尔時舍利弗問意般若無生緣處行者亦
無生如是般若與何法合終歸何處任得何
果報答曰般若波羅蜜無生相故無所合若

般若波羅蜜有法合者若善若不善等是不
名般若波羅蜜今無所合故入般若波羅蜜
數中問曰若尔者帝釋已知一切法不合何
以獨問薩婆若不合荅曰帝釋貴重深著是
般若於薩婆若愛未斷故言乃至薩婆若亦
不合耶佛荅般若波羅蜜薩婆若亦不一
切法畢竟無生故此中佛破斷滅邪見故說
合般若波羅蜜不如凡夫人取相著名作起
有爲法合如佛心合問曰云何如佛心合荅
曰一切相虛誑故不取相一切法中有無常
等過咎故不受吾我心縛著世間皆動相故
不任能生種種苦惱後變異故不著一切世

間顛倒顛倒果報不實如幻如夢無所滅故
不斷是故佛不著法不生高心入畢竟空善
相中深入大悲以救衆生菩薩應如佛心合
帝釋歡喜讚言希有是般若波羅蜜不破壞
諸法不生不得不失故而能成就菩薩令得
至佛須菩提言若菩薩用有所得如是分別
一切智等一切法若合若不合是菩薩則失
般若波羅蜜佛然可其言如是更有因緣菩
薩若取汝所說一切法無合不合取是空相
言般若空無所有不牢固是亦失般若波羅
蜜須菩提知般若波羅蜜不可得相是故問
若信般若波羅蜜信何法般若波羅蜜空亦

不可得爲決定心於何法佛言色等一切法不可信何以故色等一切法自性不可得故不可信

須菩提白佛言世尊是般若波羅蜜名爲摩訶波羅蜜須菩提何因緣故是般若波羅蜜名爲摩訶波羅蜜須菩提言世尊是般若波羅蜜不作色大不作色小受想行識不作大不作小眼乃至意色乃至法眼識界乃至意識界不作大不作小檀波羅蜜乃至禪波羅蜜不作大不作小內空乃至無法有法空不作大不作小四念處乃至阿耨多羅三藐三菩提不作大不作小諸佛法不作大不作小

諸佛不作大不作小是般若波羅蜜不作色
合不作色散受想行識不作合不作散乃至
諸佛不作合不作散色不作無量不作非無
量乃至諸佛不作無量亦不作非無量色不
作廣不作狹乃至諸佛不作廣不作狹不作
色有力不作色無力乃至諸佛不作有力不
作無力卅尊以是因緣故是般若波羅蜜名
摩訶波羅蜜卅尊若新發意菩薩摩訶薩若
不遠離般若波羅蜜不遠離禪波羅蜜不遠
離毗梨耶波羅蜜不遠離羣提波羅蜜不遠
離尸羅波羅蜜不遠離檀波羅蜜如是念是
般若波羅蜜不作色大不作色小乃至諸佛

不作大不作小色不作合不作散不作色無
量不作色非無量不作色有力不作色無力
乃至諸佛不作有力不作無力世尊菩薩摩
訶薩若如是知是為不行般若波羅蜜何以
故是非般若波羅蜜相所謂作色大小乃至
諸佛作大小色有力無力乃至諸佛有力無
力世尊是菩薩摩訶薩用有所得故有大過
失所謂行般若波羅蜜時作色大作色小乃
至諸佛作有力作無力何以故有所得相者
無阿耨多羅三藐三菩提所以者何衆生不
生故般若波羅蜜亦應不生色不生故般若
波羅蜜不生乃至佛不生故般若波羅蜜不

主衆生性無故般若波羅蜜性無色性無故
般若波羅蜜性無乃至佛性無故般若波羅
蜜性無衆生非法故般若波羅蜜非法色非
法故般若波羅蜜非法乃至佛非法故般若
波羅蜜非法衆生空故般若波羅蜜空色空
故般若波羅蜜空乃至佛空故般若波羅蜜
空衆生離故般若波羅蜜離色離故般若波
羅蜜離乃至佛離故般若波羅蜜離衆生無
有故般若波羅蜜無有色無有故般若波羅
蜜無有乃至佛無有故般若波羅蜜無有衆
生不可思議故般若波羅蜜不可思議色不
可思議故般若波羅蜜不可思議乃至佛不

可思議故般若波羅蜜不可思議衆生不滅
故般若波羅蜜不滅色不滅故般若波羅蜜
不滅乃至佛不滅故般若波羅蜜不滅衆生
不可知故般若波羅蜜不可知色不可知故
般若波羅蜜不可知乃至佛不可知故般若
波羅蜜不可知衆生力不成就故般若波羅
蜜力不成就色力不成就故般若波羅蜜力
不成就乃至佛力不成就故般若波羅蜜力
不成就世尊以是因緣故諸菩薩摩訶薩般
若波羅蜜名爲摩訶波羅蜜

釋曰須菩提聞佛所說疑心開解讚嘆般若
波羅蜜言是般若名爲摩訶波羅蜜佛反問

須菩提於汝意云何何以名為大波羅蜜須
菩提荅色等諸法不作大不作小故凡夫人
心於諸法中隨意作大小如人急時其心縮
小安隱富樂時心則寬大又如八背捨中隨
心故外色或大或小又如凡夫人於眼見色
中非色事亦言色如指業指量指數指一異
等法合為色是名色作大有人眼見色可見
處名色不可見處不名色有人言麤色虛誑
非真色但微塵常故是真色微塵和合時假
名為色是名色作小如是等因緣凡夫人於
色或作大或作小隨憶想分別故破諸法性
般若波羅蜜隨色性如實觀不作大小不合

不散者般若波羅蜜不說微塵色和合更有色
生但有假名無有定相色是故無合無散色
無邊故無量無處不有色無時不有色故無
有量色是作法般若波羅蜜中不以微塵合
故有麤色不以麤色散故還歸微塵是故言
不合不散起法有分別籌量多少不得言不合不
散無量如凡人空故說無量實故說有量般若波
羅蜜遠離空實故言非量非無量凡夫人隨
心憶念得解故於色作廣作狹般若波羅蜜
觀實法相不隨心故非廣非狹凡夫人不知
和合因緣生諸法故言色有力如合衆縷以
爲繩不知者謂繩有力又如墻崩殺人言墻

有力若各各分散則無有力般若波羅蜜知
和合相不說一法有力不說言無力是故名
摩訶波羅蜜復有大因緣若菩薩不遠離六
波羅蜜色等諸法不作大不作小但行般若
波羅蜜則心散亂不調順多生疑悔邪見失
般若波羅蜜相若與五波羅蜜和合行則調
柔不錯能成辦衆事譬如八聖道分正見是
道若無七事佐助則不能辦事亦不名正見
是故佛說一切諸善法皆從因緣和合共生
無有一法獨自生者是故和合時各各有力
但力有大小是名行般若波羅蜜若菩薩離
五波羅蜜行般若波羅蜜分別色等諸法若

大若小等是人即墮用有所得墮有邊中若
於色等諸法無所分別若大若小離五波羅
蜜著是不大不小等空相先分別諸法大小
有所得爲失今著不大不小等空相亦是失
所以者何此中須菩提說因緣有所得相者
乃至無阿耨多羅三藐三菩提所以者何阿
耨多羅三藐三菩提寂滅相無所得相畢竟
清淨相有所得相者生諸戲論諍競一切法
無生無滅無所得相如我衆生十方求索不
可得但有假名實不生衆生不生故般若波
羅蜜亦如衆生相破吾我顛倒故不生不滅
如色等諸法生相不可得故不生二法攝一

切法若衆生若法此二法因緣和合生但有
假名無有定性若法無定性此法即是無生
是二法無生故當知色等諸法亦無生衆生
法無性無所有空離不可思議不滅不可知
亦如是衆生力不成就故般若波羅蜜力不
成就者先說一切法從因緣和合生各各無

自力般若波羅蜜知諸法各各無自力故無
自性無自性故空般若波羅蜜從諸法生故
無自力無自力故亦同諸法畢竟空是故說
衆生及法力不成就故般若波羅蜜力亦不
成就問曰先說色等諸法不作有力不作無
力今何以更說衆生及色等諸法力不成就

故般若波羅蜜力亦不成就。答曰：上說般若觀諸法，不作有力，不作無力。聽者謂般若波羅蜜能作是觀，即有大力。是故此中說衆生色等力不成就。故般若波羅蜜力亦不成就。如是等種種因緣，故名摩訶波羅蜜。

大智度論釋信毀品第四十一上

爾時慧命舍利弗白佛言：世尊，有菩薩摩訶薩，信解是般若波羅蜜者，從何處終來，生是間，發阿耨多羅三藐三菩提心，來爲幾時，爲供養幾佛，行檀波羅蜜，尸羅波羅蜜，羼提波羅蜜，毗梨耶波羅蜜，禪波羅蜜，般若波羅蜜。來幾時，能隨順解深般若波羅蜜義。佛告舍

利弗是菩薩摩訶薩供養十方諸佛來生是
間是菩薩發阿耨多羅三藐三菩提心來無
量無邊阿僧祇百千萬億劫是菩薩摩訶薩
從初發心常行檀波羅蜜尸羅波羅蜜羼提
波羅蜜毗梨耶波羅蜜禪波羅蜜般若波羅
蜜供養無量無邊不可思議阿僧祇諸佛來
生是間舍利弗是菩薩摩訶薩若見若聞般
若波羅蜜作是念我見佛從佛聞舍利弗是
菩薩摩訶薩能隨順解深般若波羅蜜義以
無相無所得故須菩提白佛言世尊是般若
波羅蜜可聞可見耶佛告須菩提是般若波
羅蜜無有聞者無有見者般若波羅蜜無聞

無見諸法鈍故禪波羅蜜毗梨耶波羅蜜羸
提波羅蜜尸羅波羅蜜檀波羅蜜無聞無見
諸法鈍故內空無聞無見諸法鈍故乃至無
法有法空無聞無見諸法鈍故四念處無聞
無見諸法鈍故乃至八聖道分無聞無見諸
法鈍故佛十力乃至十八不共法無聞無見
諸法鈍故須菩提佛及佛道無聞無見諸法
鈍故須菩提白佛言世尊是菩薩幾時行佛
道能習行如是深般若波羅蜜佛告須菩提
是中應分別說須菩提有菩薩摩訶薩初發
意習行深般若波羅蜜禪波羅蜜毗梨耶波
羅蜜羸提波羅蜜尸羅波羅蜜檀波羅蜜以

方便力故於諸法無所破壞不見諸法無利
益者亦終不遠離行六波羅蜜亦不遠離諸
佛從一佛世界至一佛世界若欲以善根力
供養諸佛隨意即得終不生母人腹中終不
離諸神通終不生諸煩惱及聲聞辟支佛心
從一佛世界至一佛世界成就衆生淨佛世
界須善提如是等諸菩薩摩訶薩能習行深
般若波羅蜜須善提有菩薩摩訶薩多見諸
佛若無量百千萬億從諸佛所行布施持戒
忍辱精進一心智慧皆以有所得故是菩薩
聞說深般若波羅蜜時便從衆中起去不恭
敬深般若波羅蜜及諸佛是菩薩今在此衆中

坐聞是甚深般若波羅蜜不樂便捨去何以
故是善男子善女人等先世聞深般若波羅
蜜時棄捨去今世聞深般若波羅蜜亦棄捨
去身心不和是人種愚癡因緣業種是愚癡
因緣罪故聞說深般若波羅蜜訾毀訾毀般
若波羅蜜故毀訾過去未來現在諸佛一切

智一切種智是人毀訾三世諸佛一切智起
破法業因緣集故無量百千萬億歲墮大地
獄中是破法人輩從一大地獄至一大地獄
若火劫起時至他方大地獄中生在彼間從
一大地獄至一大地獄彼間若火劫起時復
至他方大地獄中生在彼間從一大地獄至

一大地獄如是遍十方彼間若火劫起故從
彼死破法業因緣未盡故還來是間大地獄
中生此間亦從一大地獄至一大地獄受無
量苦此間火劫起故復至十方他世界生畜
生中受破法罪業苦如地獄中說重罪漸薄
或得人身生生盲人家生旃陀羅家生除廁擔
死人種種下賤家若無眼若一眼若眼瞎無
舌無耳無手所生處無佛無法無佛弟子處
何以故種種破法業積集厚重具足故受是果
報尔時舍利弗白佛言世尊五逆罪與破法
罪相似耶佛告舍利弗不應言相似所以者
何若有人聽說是甚深般若波羅蜜時毀訾

不信作是言不應學是法是非法非善非佛
教諸佛不說是語是人自毀些般若波羅蜜
亦教他人毀些般若波羅蜜自壞其身亦壞
他人身自飲毒殺身亦飲他人毒自失其身
亦失他人身自不知不信毀些深般若波羅
蜜亦教他人今不信不知舍利弗如是人我
不聽聞其名字何況眼見何以故當知是人
名為汙法人為墮衰濁黑性如是人若有聽
其言信用其語亦受如是苦舍利弗若人破
般若波羅蜜當知是名為破法人舍利弗白
佛言世尊世尊說破法之人所受重罪不說
是人所受身體大小佛告舍利弗不須說是

人受身大小何以故是破法人若聞所受身
大小便當吐熱血若死若近死苦是破法人聞
如是身有如是重罪是人便大愁憂如箭入心漸
漸乾枯作是念破法罪故得如是大醜身受
如是無量苦以是故佛不聽舍利弗問是人
所受身體大小舍利弗白佛言願佛說之為
未來世作明戒令知破法業積集故得如是大
醜身受如是苦佛告舍利弗後世人若聞是
破法業積集厚重具足受大地獄中久久無
量苦聞是久久無量時苦足為未來世作明戒
舍利弗白佛言世尊若白性善男子善女人
聞是法足作依止寧失身命終不破法自念我

若破法當受如是苦

釋曰舍利弗聞般若波羅蜜甚深微妙聞者尚難何況能行是故言信解般若者是為希有是故問世尊若信解般若者是人於何處終來生是聞舍利弗作是念是人應從好世界中來生是聞是人不應新發意不應少供養佛不應少行六波羅蜜必是大德人未聖而能知聖法故是故問發意幾時供養幾佛行六波羅蜜幾時能隨順解深般若義者是菩薩於諸法不取相不著空行空和合五波羅蜜行般若波羅蜜用大慈悲心為一切衆生行般若波羅蜜故十方諸佛清淨世界中終來生是

間者爲度有緣衆生又與釋迦文足佛共因緣故雖有此間死此間生者但以從他方佛所來者貴故發心來無量阿僧祇劫諸福德力集厚故能信解隨順深義有人雖無量阿僧祇劫發心久不行功德者是故說從發心來常行六波羅蜜常行六波羅蜜福德故能

得見能得供養無量五洲邊阿僧祇佛是菩薩成就上四因緣故得無量無邊福德智慧是福德因緣故諸煩惱薄心柔軟菩薩信慧等諸根利轉增得力故深入般若波羅蜜汗馱世間事若見般若經卷即時心生如見佛若披卷尋義即時心生如從佛聞信力成就慧

力故隨順解深般若義所謂一切無相故出
十二入二法不二法中心無所著故名無所
得略說三相是順解般若波羅蜜義須菩提
聞見經卷如是佛讚經文如從佛聞如似有
著是故問般若可見可聞耶須菩提意以般
若波羅蜜畢竟空天眼天耳猶不能見聞何
況肉眼耳出世間慧眼亦不得見何況世
間眼佛順其意答般若波羅蜜不可得見聞
此中說因緣諸法入般若波羅蜜中皆一相
無相是中無分別聞者見者及可聞可見三
界凡夫人作分別是眼是色是耳是聲六情
是利六塵是鈍色等諸法是鈍慧等是利諸

法入般若波羅蜜中如百川歸海皆爲一味
是故說般若波羅蜜不可見不可聞以諸法
鈍故從檀波羅蜜乃至佛道須陀洹乃至佛
亦如是復次衆生離法不能聞不能見法離
衆生亦不能聞不能見問曰上已問菩薩發
意幾時供養幾佛能順解深義今何以更問
答曰上佛說般若無聞無見亦說見般若經
卷如見佛說般若如從佛聞二相說是般若
亦言可見可聞亦言不可見不可聞是故還
問佛菩薩幾時行得是方便能行有能行無
行有不墮三界行無不墮斷滅能隨般若波
羅蜜相行佛答有此事不定應當分別說或

有菩薩初發心便能習行甚深六波羅蜜習
行者一心信受常行方便力故者雖行六波
羅蜜起福德因緣而心不著諸法無所破壞
者是菩薩信力智慧力大故聞摩訶衍深法
即時信聞聲聞法亦信聞外道在家出家法
亦不破壞而於中出二種利一者分別是道
非道捨非道行是道二者一切法入般若波
羅蜜中無是無非無破無受不見諸法無利
益者即是上說於中出利者是福德具足故
終不遠離六波羅蜜乃至淨佛世界略說義
有菩薩雖新發意深信受是般若波羅蜜有
菩薩久發意供養千萬億諸佛用有所得行

六波羅蜜不信受是般若波羅蜜此中佛自
說因緣是人於過去世間深般若波羅蜜不
信不受去今佛從坐起作爲說不信不受破般
若波羅蜜罪果報故說是人不信不受業因
緣故即起愚癡業因緣得愚癡業因緣故疑
悔惡邪著心轉增著心轉增故於大眾中毀
訾破壞般若波羅蜜破壞般若波羅蜜故破
三世十方諸佛一切智破三世十方諸佛一
切智罪故轉身墮大地獄大地獄者阿鼻地
獄無量百千萬億阿僧祇歲受憂愁苦惱憂
愁是心苦苦惱是身苦從一大地獄至一大
地獄者如福德因緣故上有六欲天罪業因

緣亦如是下有八種大地獄八種大地獄各有十六小地獄是中阿鼻最大餘須彌四天
下亦如是是三千大千世界中有百億須彌山
有百億阿鼻地獄是故說從一阿鼻大地獄
至一阿鼻大地獄如人從會至會又如入正
位者從天上來受人間樂從人中還至天上

受樂若此間火劫起其罪未盡故轉至他處
十方世界地獄中受罪若彼間火劫起復展
轉至他方他方火劫起復還生此間阿鼻地
獄中展轉如前是破般若波羅蜜罪小減展
轉生勤苦畜生中此間火劫起復生他方世
界畜生中展轉受苦彼間火劫起還來此間

復展轉如前罪轉微輕或得人身生下賤家
所謂生盲家不欲見般若波羅蜜罪故輕賤
說法人故生旃陀羅及除糞擔死人等下賤
家毀訾說法者故無舌不欲聞故無耳摩手
非撥故無手此人心雖愛佛以愚癡無智故
毀滅佛母破壞法藏破壞法藏故生無佛法
衆處問曰何以不說生餓鬼中答曰是破壞
法者多以二煩惱所謂瞋恚愚癡貪發故墮
餓鬼此中無慳故不說問曰舍利弗何以言
五逆罪與破法罪相似答曰舍利弗聲聞人
常聞五逆罪最重墮阿鼻地獄一劫受苦聲
聞人不悉知供養般若若得大果報又不知謗

毀般若得大罪故舉五逆對問相似不得言
相似者以相去懸遠故所以者何此人毀謗
般若者自失大利亦令他失自遠離般若亦
令他遠離自破壞善根亦破他善根自塗邪
見毒亦塗他邪見毒自失其身亦失他身自
不知故著法愛故自破亦令他破般若波羅蜜
如父母愛子恩極一卅又以因緣故愛是行
般若波羅蜜菩薩於無邊卅中深心愛念衆
生父母念子無能以一眼與者行般若波羅
蜜者於無邊劫中以頭目髓腦積過須彌以
施衆生出佛身血殺阿羅漢但壞肉身不壞
法身壞僧是離眷屬讚五法不壞般若故

五逆罪不得似壞般若波羅蜜般若波羅蜜能令人作佛毀般若罪則無喻是故破般若人我不欲不聽聞其名字何況眼見是破般若或先世福德因緣廣學多聞富貴威德巧於談語諸魔官屬常隨逐佐助故未得阿鞞跋致菩薩見其多人供養多有出家在家弟子是故若有讚其名者不聽聞之何況親附禮拜受其教訓所以者何菩薩欲增長善法利益衆生是人欲破法令衆生墮大衰濁二事相違故衰濁者如人著衰雖好衣美食常無色力雖勤身作務財產日耗是人壞一切佛上法寶故雖身口業善持戒布施讀經善法終

不增長如濁水泥不見面像亦不中飲是人
不中親近若親近者則喜染著是人破法故
邪見疑悔常擾亂心先所聞法深染愛著不
解般若波羅蜜相故言般若波羅蜜無所有
空不堅固無有罪福如是濁亂蔽其心故不能
得見清淨實法相黑性者佛法中善法名白
不善法名黑是人常積集不善法故成不善
性若有信受其語其罪亦同問曰舍利弗何
以問是人受身大小而佛不荅荅曰舍利弗
既聞受罪時節及處所不聞其身大小意欲
聞佛說其大身又如帝釋身長十里受樂遍
滿故欲知受罪身大受苦亦多有二因緣故

佛不爲說一者上已說其在二惡道中久受苦惱今復說其身大醜惡人或不信不信者當受久劇之苦故二者若信佛語則大憂怖憂怖故風發吐熱血死若死等者設令不死身常乾枯若不信後世受重罪故佛不說舍利弗白佛今雖以二因緣故不說願憐愍

來世人故說佛言若有善根白性福德人作依止白性者與黑性相違依止者聞是受苦更不敢作若不信雖說身大亦不信若信聞上受苦久遠足可信三業中應攝身口意

大智度論卷第六十二

釋第三十九品
訖第四十品上

端

闇

下經反

莫

上烏反

嘿

默字

照

照字

摧

下徒反

狹

咸反

夾

縮

所六反

籌

量上流反

直

友

鈍

徒反

廁

初使反

眼

瞎下八反

衍

音演

非

廢

下并反

擾

音處

摩

手為反

繩

上為反



